

LA QUOTIDIANA

Redacziun: Via Sommerau 32, 7007 Cuir, tel. 081 255 57 10, redacziun@laquotidiana.ch

Otgonta mauns fermes

Ils emprendists dad Implenja en acziun sin 2100 m s. m.

■ **Sill'Alp Nagens sanescha la fundaziun Pro Laax dapresent il mir da cunfin.** Igl ei in mir da cunfin construius avon 140 onns sin 2100 m s. m. Pil vitg puril da Laax ha quei mir giu gronda muntada, pertgei mintga sperdita si d'alp aveva consequenzas. Per proteger las vaccas dalla greppa da

Platt'Alva encunter Flem han ins baghegiu in liung mir. Quel ei ius en emblidanza e negin havess fatg stem dad el. Convischins da Laax han rendiu attent la fundaziun Pro Laax da quei fatg. Avon dus onns ha il president da quella, *Erwin Ardüser*, ensemen cul menader digl uffeci da baghegiar, *Au-*

gustin Calivers, fatg in'uatga al liug ensemen cul specialist per mirs schetgs *Matthias Götsch*. E questa jamna vegn el sanaus. 40 emprendists dall'Implenja, la pli gronda interpresa da baghegiar dalla Svizra, prestan lavur cumina.

➤ PAGINA 3



Ils emprendists renoveschan quest'jamna rodond 300 meters dil mir.

FOTO A. BEELI

Crap sin crap, senza maula

40 emprendists dil concern Implemia reconstrueschan il «mir chines» dall'Alp Nagens sur Laax

■ (anr/abc) Ier ha la fundaziun Pro Laax envidau las medias da visitar in plazzal da baghegiar. Quel ei buca zanna el vitg da Laax, era buca exnum el-la vischinonza da quel. Il plazzal ei sin 2128 m s. m. sill'Alp Nagens. L'Alp Nagens sur Laax ei in territori cultivau vegliander. Gia el testament digl uestg Tello, il pli vegl document dil Grischun, eis ella menziunada sco alp «Agise». Gia dapì varga 1250 onns pasculescha la biestga en quei territori. Da cheu anora meinan sendas en tuttas direenziuns. Ina meina encunter il Plaun Segnes Sut, da leu van ins encunter il Pass dil Segnes e sa cuntinuar giuaden Glaruna. Cheu haveva la secziun Pèz Terri baghegiu sia emprema camona pils alpinists. Da macort'aura ha ei en quei territori savens tschaghera e spessa brentina. Fetg prigulus per la biestga che pasculescha. L'Alp Nagens schai el territori nua che la Bova da Flem ei rutta ora avon rodund 10000 onns. Las pastiras da Laax ein bialas e migei-

vlas, encunter nordost cunfineschan el-las culla spuretga e prigulusa Platt'Alva da Flem. Igl ei il scarp dalla bova prehistorica.

Pli baul construiu cun stentas

Igl onn 1870 han ils da Laax entschiet a baghegiar in mir da schurmetg en quei liug. Per che las vaccas crodien buca dalla greppa giu. Igl ei in mir da rodund 1200 meters lunghezia, el entscheiva sin 2096 m s. m. e sestenda encunter nord tochen sil sumfil sin 2250 m s. m. Oz ei il mir danvonz, pertgei novas metodos da pertgirar cun seivs electricas garantezschan la segirtad dalla muaglia. Il liug mir impressiunont han ils da Laax denton buca vuliu schar ir en decadenza. Igl ei ina perdetga d'in temps ch'ins fageva bia sacrificez, ch'ins cultivava cun stenta e fadigia il funs e pertgirava il muvel. Oz levgieschan novas metodos quella lavur a maun.



Ilis emprendists d'Implemia culs accompignaders. Davostier vesta viers il Crap da Flem ed il Plaun.

FOTOS A. BIELI



Il president dalla Pro Laax, Erwin Ardüsser (davontier), ei satisfatgs ed engrazieivels dil sustegn.

Quest'jamna san 40 emprendists dall'interpresa Implemia imprendere d'enconuscher quella lavur a maun da pli baul. Lur firma ha tarmess els per in'jamna si dalla Bassa ellas muntognas per separticipar ad in'jamna da project. Valerie Frede ch'ei menadra dils ressort dils emprendists tier Implemia ei menadra dil camp. Implemia ha sia sedia a Dietikon ed occupescha rodund 10000 persunas ell'entira Europa. Igl onn 2017 ha ella fatg ina sviulta da 3,9 milliardas francs.

Ilis emprendists da tuttas parts dalla Svizra ch'ei quest'jamna sill'Alp Nagens lavuran buca per quella sviulta. Els prestan lavur gratuita ed imprendan d'enconu-

scher la tecnica da construir mirs senza maula. Frede habitescha a Laax ed ei colliada da pintga ensi cun quella vischnaunca. Grazia ad ella ha la fundaziun Pro Laax ha saviu organisar la renovaziun dil mir schetg da Nagens. Avon dus onns haveva ina inspeziun al liug mussau ch'igl ei in project fetg voluminus. Grazia als emprendists dad Implemia selai quel ussa realisar. A caschun dalla viseta dad ier han ins saviu seperschuader co ils giuvenils lavuran. Il specialist da mirs schetgs e menader tecnic dil project, Matthias Götsch, ei fetg cuntents culla prestaziun. «Bein, ils biars ein iniziatives ed interessai», ha el sincerau sin damonda dall'anr. Götsch ei

staus participaus vid la reconstruziun dil mir schetg Cleus a Schluein. Margis sera ha Simone Jakob Federspiel, collaboratura digl Uffeci cantunal per natira ed ambient, visitau ils giuvenils. Ella ha presentau l'imputonza dils mirs schetgs e rendiu attent che la crappa cavigliada ina sin l'autra senza maula ein loghens da sezuppar per reptils ed auters animals. Mo cun forza dalla bratscha e dils mauns han era ils emprendists dad Implemia stuiu cavigliar in crap sin tschel. Per part fuva il mir daus ensemen dilut, per part fuva el intact. Sco quei che Frede ha confirmau han ils emprendists dad Implemia saviu sanar in quart digl entir mir.